

# Agid per las victimas d'anteriuras arbitrariadads da las autoridades

■ (cc) Ier, ils 11 d'avrigl 2013 ha gi lieu a Berna in'occurrenza commemorativa naziunala cun la cussegliera federala **Simonetta Sommaruga** per las victimas d'anteriuras mesiras repressivas per motivs da provediment sco er d'anteriurs plazzaments en terzas famiglias.

Envidads èn uffants plazzads pli baud en terzas famiglias u en chasas d'uffants, persunas internadas tras las autoridades, persunas sterilisadas sfurzadamain sco er autras victimas da mesiras repressivas per motivs da provediment. La confederaziun, ils chantuns, las citads e las vischnancas, las baselgias chantunals, l'Uniun purila svizra e represchentanzas d'instituziuns da chasas d'uffants vulessan prestar uschia ina contribuziun per renconuscher las circumstanzas difficilas, en las qualas las persunas pertutgadas èn creschidas si.

Ultra da questa occurrenza commemorativa duain las victimas er survegnir in agid concret. La regenza grischuna benventa l'elavuraziun dal tema e las stentas da la confederaziun per rehabilitar las persunas pertutgadas. Sco quai che la supprastanza da la conferenza da las directuras e dals directurs chantunals dals affars socials recumonda vegn nominà er en il chantun Grischun in post da contact per victimas da mesiras repressivas per motivs da provediment, e las persunas pertutgadas survegnan sustegn per prender invista da las actas da quel temp. Sin conclus da la regenza vegn l'Uffizi dal servetsch social



chantunal (post da cussegliaziun per l'agid a victimas, tel. 081 257 31 50, e-mail: [opferhilfe@soa.gr.ch](mailto:opferhilfe@soa.gr.ch)) designà sco post da consultaziun uffizial per dumondas en connex cun mesiras repressivas per motivs da provediment da pli baud e cun anteriurs plazzaments en terzas famiglias. L'archiv dal stadi dal Grischun gida las persunas pertutgadas a tschertgar actas ed a prender invista da talas (tel. 081 257 28 03, e-mail: [info@sag.gr.ch](mailto:info@sag.gr.ch)).

La pratica da las uschenumnadas mesiras repressivas per motivs da provediment e dals uschenumnads plazzaments en terzas famiglias era usitada en Svizra fin en ils onns 80 dal 20avel tschientaner. Umans che na correspundevan betg a las ideas da las valurs socialas e moralas da quel temp pudevan – sin ordinaziun da las autoridades administrativas – vegnir internads, vul dir mess en instituziuns serradas, ubain vegnir plazzads en terzas famiglias

u en chasas d'uffants. Er aborts sfurzads e sterilisaziuns sfurzadas sco er adopziuns sfurzadas èn vegnidas ordinadas. Davart il dumber da persunas che han stuì subir mesiras repressivas per motivs da provediment u plazzaments en terzas famiglias en il chantun Grischun n'èn avant maun naginas datas.

Dapli infurmaziuns sin [www.fuersorgerischezwangsmassnahmen.ch](http://www.fuersorgerischezwangsmassnahmen.ch)

Ier ha gi lieu a Berna in'occurrenza commemorativa naziunala per las victimas d'anteriuras mesiras repressivas per motivs da provediment sco er d'anteriurs plazzaments en terzas famiglias.

KEYSTONE